

heuet. **L**aet my my seluen niet ver-  
 liesen die du soe mynlick heuest ver-  
 loest. **I**n die helle weer ick langhe  
 begrauen. en hadde my dijne gron-  
 delose guetheit niet onthouden. **I**c  
 bekenne ick hebbe misdacn. ic bid  
 de ghenade. ick kusse die roede. **I**ck  
 biede nu den hals hie is vake ver-  
 boert. ick doe ghetuuch van my sel-  
 uen. ende ick wil alheel an dy bli-  
 uen. du heuest olie ende wijn. du  
 kanste saluen en slaen. **B**ehoede my  
 voer den groten hamer. ick wil my  
 der roeden troesten. doch beghere ic  
 here een sachte hart. **L**aet my ghe-  
 nadelick hie purgieren. laet my i  
 staden staen din bitter lyden. din  
 hellighe wonden. din bitter doet-  
 ende dure bloet. en din open sijde.  
**E**n als ick rumen en beghene sall  
 dese ellendighe werlt. dan laet my  
 lieue here din trouwe herte opluke.